



Inilalathala ng Partido Komunista ng Pilipinas-Bagong Hukbong Bayan sa rehiyong Bikol

REBOLUSYONARYONG PANGMASANG PAHAYAGAN NG BIKOL

Taon XXII Blg.2
Abril-Hunyo 1999

EDITORIAL

Sa pagdiriwang ng ika-30 taon ng Bagong Hukbong Bayan matatag na panindigan ng hukbo ang kapasyahang palakasin ang rebolusyonaryong pakikibaka. Higpitan ang pagkapit sa baril at isulong ang demokratikong rebolusyong bayan hanggang sa tagumpay at para maitayo ang sosyalistang lipunan sa hinaharap.

Kapansin-pansin ang pagsigla ng B H B sa Bikol sa pagganap sa lahatang-panig na tungkulin sa pagsusulong ng demokratikong rebolusyong bayan sa pamumuno ng Partido Komunista ng Pilipinas. Higit pang lumaki ang kakayahan nito na magkamit ng mga tagumpay sa pagpupunyagi sa kilusang pagwawasto. Patuloy na nagsasagawa ng pampulitika at pang-ideolohiyang edukasyon at nagsasanay sa pulitika at militar ang mga kadre at mandirigma. Ang mga taktikal na opensibang inilunsad ng BHB sa buong rehiyon sa mga nakaraang taon ay nagdulot ng pinsala sa kaaway at nagpabulaan sa propaganda nito na, diumano, nadurog na ang BHB dito. Nagpataas din ito sa diwang palaban ng hukbo at masa at nagdagdag ng armas at iba pang kagamitan sa BHB.

Bukod sa paglulunsad ng armadong pakikibaka, isinulong din ng BHB ang rebolusyong agraryo at pagtatayo ng baseng masa. Batay sa pinakahuling pagtatasa ng mga suhetibong pwersa sa rehiyon, halos nadoble ang bilang ng mga kasapi ng saligang organisasyong masa. Nakatayo ito ngayon sa ilang libong baryo ng ilampung bayan sa anim na probinsya ng Bikol. Dumarami rin ang sumasapi sa hukbo. Noong 1998, umabot ng 27% ang nadagdag sa lakas-tauhan nito at lumaki ng 50% ang bilang ng milisyang bayan.

Sa paggunita sa pagkakatatag ng BHB noong Marso 29, ipinagbunyi nito ang lahat ng natamong mga tagumpay sa 30 taong pakikidigma laban sa malakolonyal at malapyudal na sistema. Pinagpupugayan ang mga kadre at kasapi ng Partido, mga Pulang kumander at mandirigma sa kanilang mga sakripisyo, puspupang paggawa at magiting na pakikibaka. Binibigyan ng pinakamataas na



PALAKASIN ANGREBOLUSYONARYONG PAKIKIBAKA

parangal ang mga martir sa kanilang kabayanihan.

Mabilis at patuloy na lumalala ang krisis sa ekonomya at lipunan. Bumubulusok ang ekonomya ng bansa na nakasandig sa pautang at pamumuhunan ng mga monopolyo kapitalista dulot ng di maampat na krisis ng sobrang produksyon, pananalapi at kalakalan na yumayanig sa pandaigdigang kapita-lismo. Pinasasahol ito ng laganap na korupsiyon sa burukrasya at sangkot mismo ang mga kaanak ni Estrada. Walang pag-asang malutas ang kriminalidad sa bansa dahil mga tauhan mismo ng AFP at PNP ang protektor ng malalaking sindikato sa droga, ismagling at maging sa jueteng dito sa Bikol.

Ang ipinagpapatuloy ng rehimeng US-Estrada na patakarang neoliberal ay lubhang nagpasama sa kabuhayan ng mamamayan. Lansakan nitong nilalabag ang pinagtibay na Komprehensibong Kasunduan sa Paggalang sa mga Karapatang-tao at Internasyunal na Makataong Batas.

Kaya higit na nagiging paborable ang kalagayan para sa pagrerebolusyon.

Nilalaman

Editorial

- 1 Palakasin ang rebolusyonaryong pakikibaka
- 2 Mamamayan, lalong ibinabaon sa kumunoy ng karukhaan

Mga tampok ngayon

- 3 Kalagayan ng mga manggagawa sa Bikol, lumalala
- 4 Sunud-sunod na pagtaas ng presyo ng langis, ibayong pahirap sa mamamayan
- 5 Ang huwad na kalayaan at ang isandaang taong pakikibaka sa imperyalismong US
- 6 Pandaigdigang kapitalismo, niyayanig muli ng di mapigilang krisis
- 8 Internasyunal na makataong batas, igalang sa kondukta ng digma
- 9 Pagwawakas ng gobyernong Estrada sa negosasyong pangkapayapaan, kinilala ng NDF
- 10 Dapat igalang ng militar ang karapatang-tao ng mamamayan – Bernal

Silyabalita *pahina 11*

Diwang rebolusyonaryo *pahina 13*

Rebolusyonaryong awit *pahina 14*

Batoy *pahina 14*

Silyab

Rebolusyonaryong
Pangmasang Pahayagan
ng Bikol

Odessa Brillantes
Lehan del Rio-Arriado
Medel C. Sebastian

EDITORIAL 2

Mamamayan, lalong ibinabaon sa kumunoy ng karukhaan

Ang unang taon ng rehimeng US-Estrada sa poder ay malinaw pa sa liwanag ng araw na nagpapakita na lalong ibinaon nito sa kumunoy ng karukhaan ang dati nang aping mamamayan.

Patuloy na binibigyang daan ng rehimeng US-Estrada ang mga kapitalistang dayuhan na sipsipin ang dugo at pawis ng mga manggagawa ng mura at siil na lakas-paggawa, kakarampot na sahod sa pamamagitan ng kontraktwalisasyon at iba-ibang iskema ng pleksibleng paggawa. Bunga ng di mapigilang krisis sa sobrang produksyon at pampinansya na humahambalos sa pandaigdi-gang sistemang kapitalista, paparaming mga negosyo ang nalulugi at tuluyang nagsasara. Resulta nito ay kawalan ng kabuhayan sa ilang milyong manggagawa.

Nagdulot din ng matinding dislokasyon sa mga magbubukid ang walang habas na pagpasok ng mas mura at malakihang bulto ng inangkat na mga produktong agrikultural. Hindi kayang ibaba ang presyo ng mga lokal na produkto dahil sa napakataas na presyo ng abono at pestisidyong ginagamit dito. Lalong ibinubulid ng rehimeng US-Estrada ang mga magbubukid sa lubusang pagsasamantala at pang-aalipin ng mga asendero-kumprador na tulad ng padrino nito na si Danding Cojuangco sa iskemang korporatiba. Sa iskemang ito, palalabasing kasosyo raw ng panginoong maylupa ang mga magsasaka sa isang korporasyon sa pagsasaka upang hadlangang magkaroon sila ng sariling lupang sinasaka. Patuloy din ang pangangamkam ng mga dayuhang korporasyon sa kalupaan at maging sa karagatan ng bansa.

Pinasasahol pa ang aping kalagayan ng mamamayan ng abot-langit na presyo ng mga bilingin dulot ng sukdulang pagtaas ng presyo ng mga produktong petrolyo.

Pinapalangkapan ng imperyalismong US ang masugid na pagganap ni Estrada sa kanyang papel bilang sagadsaring tuta. Mas nahigitan nito ang mga naunang rehimen. Nag-uumapaw ito sa kagalakan nang pagtibayin ng rehimeng Estrada ang VFA (*Visiting Forces Agreement*) noong Mayo 26 tanda ng lubusang pagyurak sa integridad ng mamamayan at pagbebenta sa soberanya ng bansa. Ngayon ay pinaugong na ang pag-amyenda sa Saligang Batas ng reaksyunaryong gobyerno upang tanggalin ang mga balakid sa pag-aari ng mga malalaking dayuhang kapitalista ng negosyo at lupang Pilipino.

Malinaw na ang nakikinabang sa patakarang liberalisasyon, deregulasyon at pribatisasyon ay ang imperyalismong US at ang mga ahente nitong kumprador at asendero. Ang pinagtibay na VFA at pag-amyenda sa Konstitusyon ay higit pang nagpapahigpit sa dominasyon ng imperyalismong US sa bansa.

Nagdudumilat ang katotohanang lalong isinasadlak ng rehimeng US-Estrada ang mga anakpawis sa labis na pang-aapi at pagsasamantala ng mga naghaharing uri. Kung gayon, puspusang labanan at ihiwalay sa lahat ng pagkakataon ang rehimeng US-Estrada. Tanging sa pagbubuklod at pakikibaka ng aping mamamayan, sa pamumuno ng uring proletaryado, mawawasak ang malakolonyal at malapyudal na lipunan. Ito lamang ang paraan upang lubos na maisakatuparan ang tunay na repormang agraryo at pambansang industriyalisasyon na siyang aahon sa kanila sa kumunoy ng karukhaan. **S**

Kalagayan ng mga manggagawa sa Bikol, lumalala

Dumarami ang mga manggagawang nawawalan ng trabaho sa Bikol. Tiyak na lulubha pa ito ngayon at sa mga susunod na taon dahil sa ipinagpapatuloy na mga neoliberal na patakaran ng rehimeng US-Estrada.

Noong Hulyo 1998, umabot sa 1,178 katao ang nawalan ng trabaho dahil sa pagsasara ng 26 na negosyo sa rehiyon. Dagdag pa ang naapektuhan dahil sa pagbawas ng produksyon ng ilang maikokonsiderang malalaking negosyo sa Bikol tulad ng SMI Fishing Corporation at mga kumpanyang nagpoproseso ng produktong isda, ang Base Metal Resources, Urban Paragon Corporation, at ang Isarog Lines and Transport. Ayon sa isang konserbatibong pag-aaral, 8.9% ng kabuuang lakas paggawa ng Bikol ay walang empleyo samantalang 36.2% naman ang kulang sa hanapbuhay.

Sa pambansang saklaw, mas nakakabahala ang kompyutasyon ng IBON, isang institusyon sa pananaliksik, na 51% ng 2.8 milyon katao noong 1998 na walang trabaho sa bansa ay nasa kanilang pinaka-produktibong edad. Inaasahan na ang 26% nito na nasa mga edad na 20-24 ay nadagdagan pa ng mga nagtapos sa pag-aaral ngayong Abril.

Malawakan din ang kakulangan ng trabaho. Sa surbey mismo ng *burges* na Social Weather Station noong 1998, siyam sa bawat 10 Pilipino o 89% ng nasa edad na 22 pataas ay walang sapat na pinagkakakitaan. Tiyak na mas malala pa rito ang aktwal na kalagayan.

Yaon namang mga manggagawang natitira pa sa trabaho ay kulang na kulang din ang kinikita para sa pang-araw-araw na gastos. Ayon sa Pebrero 1999 na isyu ng *IBON Facts & Figures*, umaabot lang sa P110 ang aktwal na kinikita ng karaniwang manggagawa sa rehiyon mula sa P163 na sinasahod nito. Batay ito sa 63 sentimos na aktwal na halaga na kayang bilhin ng piso sa ngayon base sa halaga nito noong 1994. Pinakamababa ito kumpara sa lahat ng rehiyon sa bansa.

Sinisisi ng rehimeng Estrada ang mga manggagawa. Nagiging dahilan daw ng pagkalugi ng mga pagawaan ang mga welga at mga protesta nito. Nagbabanta pa ito na kung ipagpapatuloy ang mga nabanggit na pagkilos ay darami pa raw ang mag-sasarang pagawaan at tuluyan nang lilisan o ililipat ang pamumuhunan nito sa ibang bansa.

Mahigpit itong tinututulan ng rebolusyonaryong kilusan. Inilalantad nito na ang malubhang kawalan at kakulangan sa hanapbuhay ay manipstasyon ng isang malakolonyal at malapyudal na sistemang panlipunan. Mas lumalala pa ito dahil ipinagpapatuloy ng rehimeng US-Estrada ang pagbubukas ng ekonomya ng Pilipinas sa imperyalistang

globalisasyon. Ang imperyalismo mismo ay hinahambalos ng krisis sa sobrang produksyon, pinansya at kalakalan na nagbubunga ng mas masahol na pandaigdigang krisis sa ekonomya. Ang pagtataguyod nito ng mga neoliberal na patakaran ay pumipinsala sa kabuhayan ng mga mamamayan, lalo na sa mga manggagawa. Halimbawa nito ang patakarang mura at siil na lakas paggawa bilang pangunahing pang-akit sa mga dayuhang namumuhunan sa tabing ng islogang “manggagawang *world class*”. May panukala itong ipwera sa pagkakaroon ng minimum na sahod ang ilang industriya at baguhin ang Kodigo sa Paggawa para sa interes ng mga malalaking negosyanteng dayuhan.



Batay sa pagtatasa ng rebolusyonaryong kilusan sa Bikol, ang mapaniil na patakaran ng estado ay nagbunsod ng ibayong pagkadiskuntento sa hanay ng mga manggagawa sa rehiyon. Papaninindigan ang mga manggagawa ngayon ang naglulunsad ng mga welga para ipag-

laban ang kanilang karapatan tulad ng pagtaas ng sahod at dagdag na benepisyo. Dumami rin ang mga aktibistang manggagawa na kumikilos ngayon sa kanilang hanay.

Naninindigan ang kilusan na tanging ang pambansang industrialisasyon na idudulot ng pambansademokratikong rebolusyon ang maglalalatag ng mga kondisyon upang magkaroon ng mahusay na produktibidad para sa kapakinabangan ng mga manggagawa at iba pang mga mamamayan.

S

Talagang hindi nakukuntento ang mga monopolyo kapitalista sa dati nang napakalaking yamang pinipiga sa mamamayan. Sa nakaraang buwan ng Abril at Mayo ng taong ito, sunud-sunod ang pagtaas ng presyo ng mga produktong petrolyo at nakaamba pa itong itaas ngayong Hunyo.

Noong Abril 21, nagtaas ang Caltex ng 50 sentimos bawat litro. Tinapatan kaagad ito ng Petron (average ng 48 sentimos) at Shell (average ng 42 sentimos). Sa ikalawang linggo pa lamang ng Mayo, nagtaas ulit ng average ng 17 sentimos ang Caltex. Sinundan ito ng Shell (average ng 57 sentimos) at Petron (average ng 56 sentimos) noong Mayo 23. Humabol ulit ang Caltex ng 40 sentimos noong Mayo 28. Napakahaba na ng listahan ng pagpapabundat subalit may nakaamba pa ring pagtataas na tinatayang P1.20 bawat litro ngayong Hunyo!

Pagkukunwari at pagmamalinis

Upang pakalmahin ang galit ng mamamayan, kunyaring inatasan ni Erap ang Department of Trade and Industry (DTI) at Department of Justice (DOJ) na magbantay at magsampa daw ng kaso sa sinumang magtataas ng presyo ng mga pangunahing bilihin. Kunyaring nagmomonitor din ang Energy Regulatory Board (ERB) at Department of Energy (DOE) laban daw sa pang-aabuso ng mga kumpanya ng langis sa kanilang "karapatang magtaas ng presyo". Pinapalimot ng kasalukuyang rehimen sa mamamayan na noong Pebrero 7, 1997, ipinatupad ng reaksyunaryong gubyerno ang lubusang deregulasyon ng industriya ng langis o ang lubusang pagbibigay-laya sa mga kumpanya na magtakda

Sa ilalim ng rehimeng "para sa mahirap"

Sunud-sunod na pagtaas ng presyo ng langis, ibayong pahirap sa mamamayan

ng presyo ng mga produktong petrolyo. Sinagot ng mga kilos-protesta ng mamamayan sa lungsod ang mga pagkukunwari at pagmamalinis ng kasalukuyang rehimen.

Samu't-saring palusot

Lagi nang ikinakatwiran ng Petron, Shell at Caltex ang diumanong pagtaas ng presyo ng gastos nila sa pag-import ng krudo. Nagbawas daw ang Organization of Petroleum Exporting Countries (OPEC) ng produksyon ng krudo kaya raw tumaas ang presyo nito sa pandaigdigang pamilihan. Ikinakaila ng mga nasabing kumpanya ang sabwatan nila at ng kani-kanilang "inang kumpanya". Nalugi raw sila noong 1997 subalit lumalabas na higit na malaki ang kanilang pagkabawi. Tumaas ng 1,090% ang pinagsamasamang ganansya nila noong 1998. Malulugi raw sila kung hindi nila tatapatan ang pagtaas ng presyo ng krudo sa pandaigdigang pamilihan na ang totoo ay di pa rin nila ito ikalulugi dahil dati nang mataas ang presyo ng kanilang produkto. At upang pangatwiranan ang mga binabalak pang pagtataas, sinasabi nilang ang mga nakaraang pagtataas pa lamang ng presyo ng krudo sa pandaigdigang pamilihan ang saklaw ng kasalukuyang pagtataas din nila ng presyo sa

bansa, at hindi pa ito para sa kasalukuyang pagtataas ng presyo ng krudo.

Globalisasyon: Pakana ng mga imperyalistang mandarambong

Ang sunud-sunod na pagtaas ng presyo ng mga produktong petrolyo ay manipestasyon ng papalala at walang-awang pagsasamantala ng imperyalismo sa bansa. Dulot ng globalisasyong ibinabandera nito at ng mga neoliberal na mga patakarang idinidikta sa mga kasabwat na mga lokal na naghaharing uri, wala nang restriksyon at bukas na bukas ang bansa sa pagkamal ng supertubo ng mga monopolyo kapitalista. Ang pagtalima sa globalisasyon ng mga burukrata kapitalista-kumprador ang nagtulak sa lubusang deregulasyon ng industriya ng langis sa bansa.

Maigting na pakikibaka, sagot sa pagsasamantala

Hinding-hindi maipagtatanggol ng isang estadong sunud-sunuran sa mga imperyalista ang interes ng malawak na masa ng sambayanan. Patuloy nitong ibinubulid ang mamamayan sa katakawan ng mga monopolyo kapitalista. Maibabagsak lamang ang kasalukuyang kaayusan sa pamamagitan ng armadong pakikibaka. Papalitan ang kasalukuyang bulok na estado ng estadong tunay na magtataguyod sa interes ng uring anakpawis. Sa pamamagitan ng estadong ito, isasabansa ang mga estratehikong industriya tulad ng industriya ng langis na hindi na pagtutubuan ng iilan kundi pakikibangan na ng mamamayan. **S**



Ang huwad na kalayaan at ang isandaang taong pakikibaka sa imperyalismong US

Ang sentenaryo ng digmaang Pilipino-Amerikano ay signipikante sa paggunita sa sinasabing “Araw ng Kalayaan”. Ito ang nagsalungat sa pambabaluktot ng mga reaksyunaryong burges sa kasaysayan. Ang imperyalismong US daw ay tagapagligtas ng Pilipinas mula sa kolonyalismong Espanyol. Pilit na pinalalabo ng pambabaluktot na ito ang rebolusyonaryong pakikibaka ng sambayanang Pilipino.

Idineklara ang “kalayaan” noong Hunyo 12, 1898 sa Kawit, Cavite na may bahid ng pangangayupapa sa “ilalim ng proteksyon ng makapang-yarihan at makataong bansang Norte Amerikano”. Sumunod ang kunwa-kunwaring digmaan sa pagitan ng mga tropang Amerikano at mga kolonyalistang Espanyol. Tinapos ito sa pamamagitan ng Tratado ng Paris noong Disyembre 10, 1898 kung saan binayaran ng US ang Espanya ng 20 milyong dolyar.

Sinindihan ng Digmaang Pilipino-Amerikano ang isandaang taong pakikibaka ng mamamayan laban sa imperyalismong US. Sumiklab ito noong Pebrero 4, 1899 nang simulang pagbabarilin ng sundalong Amerikano ang mga rebolusyonaryong Pilipino sa San Juan at Caloocan. Ito ang naghudyat ng sunud-sunod na malagim na kontrarebolusyonaryong karahasan ng imperyalismong Estados Unidos. Dito rin nagsimula ang 17 taong agresyong pulitikal at militar ng Amerika, mula 1899 hanggang 1916, sa katatatag pa lamang na Demokratikong Republika ng Pilipinas. Sa pamamagitan ng sinasabi nilang “mapagpalang asimilasyon”, ang Pilipinas ay ginawang tambakan ng

sobra at yaring produkto, pinagkukunan ng hilaw na materyales, at higit sa lahat, pinagpapasasaan ang likas na yaman nito.

Sa pamamagitan ng mga burges liberal na mga palamuti, nagyayabang ang rehimeng US-Estrada at ang mga nauna sa kanya na ang Pilipinas daw ay nagtatamasa ng pambansang sobe-ranya at demokrasya. Pero, ito ay dumaranas ng pinakamabangis na hagupit ng neokolonyalismo. Sa pamamagitan ng mga lokal na pampulitika at pang-ekonomyang papet, labis-labis ang paghihirap at pagkabusabos nito sa ilalim ng mga dayuhang monopolyo kapitalista. Pilit itong ipinapailalim sa bandila ng globalisasyon sa anyo mga neoliberal na patakaran ng denasyunalisasyon, liberalisasyon, pribatisasyon at deregulasyon.

Ang pandaigdigang sistemang kapitalista ay binabagabag ng walang katumbas na krisis sa ekonomya. Umiigting ang inter-imperyalistang kontradiksyon at lumalakas ang paglaban ng mamamayan ng mga bansa sa imperyalistang pagsasamantala.

Ang imperyalismong US ay

nagkukumahog na mapanatili ang pang-ekonomya at pampulitikang dominasyon nito sa daigdig. Layon nitong gawing lunsaran ng kanyang digmang agresyon ang bansa. Kasabwat ang papet na rehimen, niratipika ang Visiting Forces Agreement. Ito ay malinaw na paglapastangan sa marubdob na adhikain ng sambayanang Pilipino para sa tunay na kasarinlan. Wala itong ibang layunin kundi ang muling pagpapalakas sa armado at pampulitikang

kontrol ng US sa bansa at ayudahan ang papet na rehimen sa kontrarebolusyonaryong mga programa at pakana nito.

Mayaman sa rebolusyonaryong tradisyon ang sambayanang Pilipino. Pinatunayan ito sa kasaysayan at magpahanggang ngayon ay patuloy na nag-iibayo ang rebolusyonaryong pakikibaka ng mamamayan laban sa pagsasamantala at pang-aapi ng imperyalismong US at mga kasabwat nitong naghaharing uri. Ang mga aral at karanasan na nahalaw sa isandaang taon ay naghatid sa bago at

mas mataas na antas ng pakikibaka.

Muli’t muli ay napapatunayan ang kawastuhan ng bagong-tipong pambansa-demokratikong rebolusyon sa pamamagitan ng matagalang digmang bayan. Bigo ang anumang panunupil ng imperyalismong US at ng papet na rehimen sa diwang mapanlaban at mapagpalaya ng sambayanang Pilipino.



Ang mga aral at karanasan na nahalaw sa isandaang taon ay naghatid sa bago at mas mataas na antas ng pakikibaka.

Pandaigdigang kapitalismo, niyayanig muli ng di-mapigilang krisis

*Paghihikahos
ng mamamayan,
lalong papatindi.
Walang trabaho.
Walang pagkain.
Walang tirahan.*

Sa nakaraang dalawang taon, ang krisis na humambalos sa pandaigdigang sistemang kapitalista ay animo superbago na rumaragasa, nananalasa, at mapangwasak na nagpalipat-lipat sa mga bayan at rehiyon ng daigdig.

Ayon sa mga ekonomista, ito ang pinakamalubhang krisis sa ekonomya ng daigdig sa nakaraang 50 taon. Wala pa itong kapantay sa lawak at bilis ng paglaganap, gayundin sa laki ng pagbagsak ng kabuhatan ng mga bansa at mamamayan. Ang lawak at lalim ng pinsala nito sa mga bansa at mamamayan ay ipinapalagay na katumbas o mas matindi pa kaysa Malaking Depresyon noong 1929 hanggang 1933.

Unang hinagupit ang Asya. Naglaho na parang bula ang ilusyon ng mga tinaguriang “sumisibol na pamilihan” dito sa naganap na krisis pinansyal noong kalagitnaan ng 1997. Gumuho ang ekonomya ng Rusya noong huling bahagi ng 1998.

Nanalasa sa Brazil at sa Amerika Latina, Silangang Europa at Timog Aprika. Nabahura ang ekonomya ng ibang bahagi ng daigdig. Sa napakiksing panahon ay napabulaanan ang alamat ng imperyalistang “globalisasyon”.

Ang US, European Union at Japan, mga sentro ng daigdig ng kapitalismo mismo, ay nililigalig ng sobrang produksyon at ngipin-sangipin na kumpetisyon sa kanilang pagitan at iba pang alyadong imperyalista. Nahaharap ang mga ito sa napakalaking kalugihan sa kalakalan, napakalaking pautang na di-mabayaran, di-mapigilang paglaki ng bilang ng disempleyo at di maampat na krisis sa pananalapi.

Mga sanhi ng kalamidad

Ang mga pangunahing dahilang sumasalanta sa ekonomya ng daigdig ay ang krisis sa sobrang produksyon, pinansya at pautang.

Ang mga neoliberal na patakarang liberalisasyon, deregulasyon at pribatisasyon ay lumikha ng napakabilis na konsentrasyon ng kapital sa kamay ng mga monopolyo kapitalista. Ang mataas na teknolohiyang ginagamit nito sa pagkamal ng dambuhalang tubo ay mabilis na nagtutulak ng krisis sa sobrang produksyon. Ito ay

dahil sa sobrang kapasidad sa produksyon habang kumikitid ang pamilihan at malakihang umuunong ang base ng pagkonsumo.

Iniluluwal ng sobrang produksyon ang depstasyon -- matumal ang benta, bumabagsak ang presyo, tubo, kalaikal at produksyon. Mabilis na tumataas ang tambak ng mga produktong di mabili. Gayundin ang mga makinaryang di mapatakbo dahil nalulugi na ang negosyo.

Sa Asya, lubhang tinamaan ng depstasyon ang Japan bunga ng pagkitid ng lokal at dayuhang pamilihan para sa mga produkto nito tulad ng kotse, at *consumer electronics*, at pagkatuyo ng pautang at pinansya. Sa ulat ng *Ang Bayan* (Oktubre-Disyembre 1998), mula 1992-1998, gumasta ang Japan ng \$655 bilyon

bilang pampasi-kad ng ekonomyang matam-lay. Umabot sa 10% ng kabuuang produk-syong lokal ang deposit sa bad-yet nito. Mula 1997, mahigit \$120 bilyon din ang ibinuho ng IMF (International Monetary Fund) bilang panaklolo sa Asya. Pero mabilis na lumiit ang pribadong konsumo

kaya tuluyang nahulog ang Japan sa resesyon. Binabagabag ang US at Europa ng napakatumal na benta, at bumabagsak na tantos ng tubo.

Ang pagguho ng mga ekonomya ng Silangang Asya na siyang responsable sa paglawak ng pandaigdigang kalakalan ay malaking tibag sa pandaigdigang pamilihan. Mula kalagitnaan ng 1997, bumagsak ng 30% ang presyo ng lahat ng produktong agrikultural at mineral nito



at nagdulot ng matinding dagok sa mga atrasadong bayan tulad ng Pilipinas na nakasalig sa ganitong eksport. Milyun-milyon ang nawalan ng traba-ho, bumagsak ang kita ng mamamayan at mabilis na lumiit ang base ng pangkonsumong masa.

Nang sumabog ang krisis, bumulusok ang halaga ng salapi sa mga bansa sa Silangang Asya at Rusya. Kaakibat nito ang pagkatuyo ng pautang at pamumuhunan, sukdulang pagtaas ng tantos ng interes, pagkabangkrap ng mga negosyo, pagsadsad ng produksyon at kalakalan, at pagragasa ng napakataas na implasyon. Nabahura ang ekonomya ng mga bansa sa Europa at Amerika Latina.

Labis na nasalanta ang ipinagmamalaking mga "sumisibol na pamilihan" na target ng kapital sa ispekulasyon at tambakan ng surplus na produkto. Nang umatake ang mga ispekulador noong 1997, sa ilang buwan lamang ay nalusaw ang trilyun-trilyong dolyar sa pamilihan ng *stock* at mga pautang. Mahigit \$100 bilyong pondo na ibinuhos sa mga bangko ang naglaho sa tangkang

sagipin ang mga salaping inaatake ng mga ispekulador. Lumipad ang mga pinaghirapang impok. Mabilis na umimpis ang kita at kumitil ito sa kabuhayan ng milyun-milyong mamamayan. Ilang ulit na niyanig ang US at Europa sa pangyayaring ito. Ang mabuway na pandaigdigang sistema sa pananalapi ay bunga ng labis na manipulasyon, pag-abuso at ispekulasyon sa pinansya habang ang ekonomya ay sinasakal ng sobrang produksyon, kumikitid na pamilihan at sumusubsob na tantos ng tubo.

Nasa kalakaran ng monopolyo kapitalismo ang malakihang utang na habang tumatagal ay lumalawak at lumalabong mabayaran. Ang krisis na ito na resulta ng labis na pag-abuso sa sistema ng pautang ay isang pinagmumulan ng dambuhalang tubo ng oligarkiya sa pinansya at dahilan ng mabuway na sistemang pinansyal.

Sa nakalipas na 22 taon, nagkaroon na ng deplasyon ng pautang na nagkait ng pinansya at ibayong nagpatindi ng depresyon sa mundo. Dahil sa tambak ng utang na di-mabayaran,

inobliga ng IMF ang mga umutang na mga bansa sa kanya na maghigpit ng sinturon, pumayag na isakripisyo ang produksyon ng pagkain at iba pang pangunahing pangangailangan ng mamamayan. Pumayag din ang mga ito na buong-layang kontrolin ng mga dayuhan ang pinakamahalagang bahagi ng ekonomya at sumunod sa lahat ng dikta sa pribatisasyon, deregulasyon at liberalisasyong pabor sa dayuhang kapital, makabayad lang sa utang.

Papaigting at mas malawakang pakikibaka

Sa kasalukuyan, napipigilan lamang ang mga kontradiksyon ng mga imperyalistang bayan sa pagitan nila dahil nagkakaisa sila sa pang-aapi at pagsasamantala sa mga manggagawa at aping mga mamamayan. Dahil inuuk-ok ang kanilang ekonomya ng napakatinding krisis sa produksyon, pinagsasanib ng mga ito ang kanilang mga rekursong at, sa pamamagitan ng tratadong pangseguridad tulad ng NATO (North Atlantic Treaty Organization), nakapaglulunsad ito ng mga digmang agresyon upang mapanatili ang kanilang dominasyon sa mga rehiyon ng daigdig. Ito ay sa pamumuno ng US, ang pangunahing imperyalistang kapangyarihan. Halimbawa nito ay ang walang habas na pambombaba ng mga tropa ng NATO sa Kosovo, Yugoslavia at ang pananalakay ng US at Britanya sa Iraq noong Disyembre 1998. Nang-uudyok din ang mga imperyalista sa mga panloob na sigalot ng mga bansang nagsasarili tulad ng sa Gitnang Silangan, erya ng Balkan, Gitnang Asya at Aprika.

Ang papalubhang krisis sa ekonomya ng daigdig at panggugulo ng mga imperyalista sa lahat ng dako ay naglalalatag ng mga kalagayan para sa pandaigdigang digmaan. Tiyak na mas iigting pa ang mga rebolusyonaryong pakikibaka na pinamumunuan ng mga Marxista-Leninistang Partido para wakasan ang imperyalismo at isulong ang rebolusyong sosyalista. **S**



Sa kasalukuyan, napipigilan lamang ang mga kontradiksyon ng mga imperyalistang bayan sa pagitan nila dahil nagkakaisa sila sa pang-aapi at pagsasamantala sa mga manggagawa at aping mga mamamayan.

Ang paggalang sa Internasyunal na Makataong Batas ay bahagi ng Kumprehensibong Kasunduan na pinagtibay ng Pambansa Demokratikong Prente ng Pilipinas (NDFP) at ng Gobyerno ng Republika ng Pilipinas (GRP). Bahagi rin ng Comprehensive Agreement on Respect for Human Rights and International Humanitarian Law (CARHRIHL) ang paggalang di lamang sa mga karapatang sibil kundi sa mga karapatang sosyo-ekonomiko ng sambayanan.

Mahalaga ito para mapangalagaan ang kapakanan ng mga mamamayan habang nagpapatuloy ang armadong tunggalian sa pagitan ng reaksyunaryong gobyerno at ng rebolusyonaryong kilusan.

Nilalaman ng ikaapat na bahagi ng kasunduan ang mga partikular na probisyon na nagpapatibay sa pandaigdigang batas ng digmaan. Itinataguyod nito ang mga pamantayan at prinsipyong nakasaad sa Mga Kumbensyon ng Geneva ng 1949 at Protocol I ng 1977 na dapat sundin ng naglalabanang pwersa sa kondukta ng digmang sibil.

Itinatakda ng Kasunduan na ang pamantayan at prinsipyo ng internasyunal na makataong batas ay aplikable sa mga sumusunod:

- ☞ mga sibilyan o walang aktibong paglahok sa mga hostilidad;
- ☞ mga myembro ng armadong pwersang sumurender na o nagsalong na ng kanilang armas;
- ☞ mga nalagay sa katayuang *hors de combat* (wala sa katayuang lumaban) dahil sa sakit, sugat o anumang dahilan;
- ☞ mga taong pinagkaitan ng kanilang kalayaan sa mga dahilang may kaugnayan sa armadong labanan; at

CARHRIHL: (Huling bahagi ng serye)

Internasyunal na makataong batas, igalang sa kondukta ng digma

☞ mga kamag-anak at awtorisadong kinatawan ng mga taong nabanggit sa itaas.

Ipinagbabawal ng kasunduan ang lahat ng uri ng pang-aabuso o anumang paglabag sa karapatan ng sinuman sa mga tinutukoy sa itaas sa lahat ng pagkakataon o sirkunstansya.

Ang mga sibilyan ay dapat ipagiba sa mga mandirigma. Ang mga sibilyan at ang kanilang mga ari-arian ay di maaaring maging target ng pambobomba, istraping, panganganyon, pangmomortar, panununog at iba pang anyo ng pagwasak sa buhay at ari-arian. Hindi rin maaaring maging target ng anumang pag-atake ang mga tauhan at pasilidad ng mga eskwelahan, propesyong medikal, institusyong relihiyoso, at lugar ng pagsamba, mga boluntaryong sentro ng ebakwasyon, mga programa, proyektong panaklolo at kaunlaran.

Itinatakda ring repasuhin at gumawa ng hakbang ang GRP para baguhin ang mga patakaran, batas, programa, proyekto, kampanya at praktika nito na nagdudulot o nagpapatibay ng sapilitang ebakwasyon o rekonsentrasyon ng mga sibilyan na nagreresulta sa pagkawasak ng kanilang kabuhayan at ari-arian. Gayundin ang pagrepaso sa patakaran ng pagbubuo, pagmimintina ng mga pwersang paramilitar tulad ng Civilian Armed Forces Geographical Units (CAFGU) at Civilian Volunteers' Organizations (CVOs) o anumang katulad na grupo. May karapatan ang mga mamamayan na hilingin ang pagbabawas sa mga gastusing militar



at ilaan ito sa mga proyektong panlipunan, pang-ekonomya at pangkultura.

Ang mga biktima ng pang-aabuso ay may karapatang bigyan ng katarungan at tumanggap ng bayad-pinsala. Maari silang magharap ng reklamo at igiit na imbestigahan, litisin at bigyan ng angkop na aksyong pandisiplina ang sinumang lumabag sa mga prinsipyo ng internasyunal na makataong batas.

Itinatakda ng kasunduan ang paglulunsad ng mga kampanyang edukasyon hinggil dito.

Komiteng Pinagsanib sa Pagmomonitor

Upang matiyak ang pagtalima sa mga probisyong isinasaad sa Kasunduan, itinatadhana ang pagbubuo ng Komiteng Pinagsanib sa Pagmomonitor mula sa epektibidad nito.

Ang NDFP at GRP ay maghihirang ng tiggatlong kagawad at magnonomina ng dalawang kinatawan ng mga organisasyon ng karapatang-tao

na uupo sa komite bilang tagamasid. Magkakaroon ito ng magkatuwang na tagapangulo na magsisilbing pangunahing kinatawan ng bawat panig. Tatanggap sila ng mga reklamo ng mga paglabag sa mga karapatang-tao at internasyunal na makataong batas at lahat ng kaukulang impormasyon. Sa paraan ng kon-

sensus, hihilingin ng komite na imbestigahan ang reklamo ng kinauukulang panig. Bubuo rin ang komite ng mga kahilingan o rekomendasyon para sa pagpapatupad ng kasunduang ito.

Isinasaad ng kasunduan na ang NDFP at GRP ay patuloy na aako ng magkahiwalay na tungkulin at

responsabilidad upang itaguyod, pangalagaan at palaganapin ang mga karapatang-tao at mga prinsipyo ng internasyunal na makataong batas alinsunod sa kanya-kanyang mga pampulitikang prinsipyo, organisasyon at sirkunstansya.

Dapat igalang ng GRP ang mga probisyon sa CARHRIHL. S

Matatag para sa kalayaan

Pagwawakas ng gobyernong Estrada sa negosasyong pangkapayapaan, kinilala ng NDFP

Pormal na kinilala ng National Democratic Front of the Philippines (NDFP) ang pagwawakas ng gobyernong Estrada sa usapang pangkapayapaan batay na rin sa sinasadyang mga akto nito.

Ayon sa NDFP, mula nang maupo sa pwesto ang rehimeng Estrada noong isang taon, walang pakundangan nitong winawalang-bahala at nilalabag ang mga mayor na kasunduang pinirmahan ng GRP at NDFP sa mahigit anim na taong negosasyong pangkapayapaan.

Ang mga ito sa partikular ay ang mga kasunduang nagtatakda ng nyutral na lugar sa pag-uusap, ang JASIG (*Joint Agreement on Safety and Immunity Guarantees*), ang komun na balangkas at prinsipyo na gigiya sa pag-uusap tulad ng mga pandaigdigang kasunduan at batas at ang prinsipyo ng paggalang sa pambansang soberanya, ang kasunduan sa pagkakasunud-sunod ng mga pag-uusap sa mga adyendang substantibo, at iba pa. Nilalabag mismo ng rehimeng US-Estrada ang CARHRIHL.

Imbes na pag-usapan kung paano ipatupad ang mga probisyon ng dokumentong ito na pinirmahan mismo ni Estrada noong ikatlong kwarto ng 1998, iginigiit ni Estrada at ng kanyang mga tauhan na pumirma ang NDFP sa isang kasulatan sa sistemang hustisya ng GRP. Kung hindi raw ito pipirmahan ng NDFP ay hindi ipapatupad ang CARHRIHL.

Tinakdaan din ng palugit ni Estrada hanggang Disyembre 1999 ang usapang pangkapayapaan, na lansakang paglabag sa kasunduan ukol sa proseso ng pag-uusap. Pinakahuling salik ay ang pagtutulak

ng rehimeng Estrada at ng GRP sa *Visiting Forces Agreement* sa pagitan ng Pilipinas at US. Sa kabila ng mariing pagtutol ng mamamayan ay niratipika pa rin ito ng Senado noong Mayo 26. Sa ganito, lubusang ibinenta at niyurakan ng rehimeng Estrada ang soberanya at integridad ng bansa.

Itinuturing ng NDFP bilang pinal na kumpirmasyon ng gobyernong Estrada sa terminasyon ng negosasyong pangkapayapaan sa pagitan nito at ng GRP ang pagpapatuloy ng nabanggit na mga paglabag o ang pagkabigo ng GRP na iwasto ang gayong mga paglabag sa mga kasunduang bilateral o ang kawalang-aksyon nito kahit walang anumang por-mal na pahayag ng terminasyon.

Ayon sa NDFP, hindi ito papasok sa negosasyong pangkapayapaan sa gobyernong Estrada "hangga't hindi rerespetuhin at ipatutupad ng gubyernong ito ang umiiral at may bisang mga kasunduang bilateral, at hindi iwinawasto ang patuloy na mga paglabag sa mga ito".

Gayunpaman, determinado ang NDF sa pagsusulong ng pambansa demokratikong rebolusyon sa pamamagitan ng digmang bayan para makamit ang tunay na kalayaan at demokrasya. Noong Hulyo 5, 1997, kusang idineposito nito sa Swiss Federal Council at International Committee of the Red Cross ang Deklarasyon ng Pananagutan sa Pagpapatupad ng mga Kumbensyon sa Geneva ng 1949 at Protokol ng 1977. May kasunduan man sa GRP o wala, tinitiyak ng NDFP na palaging bibigyan nito ng pinakamataas na pagpapahalaga ang paninindigan at paggalang sa mga karapatang-tao at internasyunal na makataong batas. S

May kasunduan man sa GRP o wala, tinitiyak ng NDFP na palaging bibigyan nito ng pinakamataas na pagpapahalaga ang paninindigan at paggalang sa mga karapatang-tao at internasyunal na makataong batas.

Dapat igalang ng militar ang karapatang-tao ng mamamayan

-- PNP Chief Insp. Bernal

Abril 9, 1999, araw ng pagpapalaya kay Philippine National Police Chief Inspector Roberto Bernal matapos ang 48 araw na pagkakabihag dito ng Bagong Hukbong Bayan (BHB) sa rehiyon ng Bikol.

Alinsunod sa naging pasya ng National Democratic Front (NDF), ibinigay ng BHB si Chief Insp. Bernal ng umagang iyon sa mga kinatawan ng International Committee of the Red Cross (ICRC) na kasama ang pamilya nito at si Senador Loren Legarda sa may paanan ng isang bundok sa Bgy. Cabid-an, Sorsogon, Sorsogon. Ang pagpapakawala kay Bernal ay bilang tugon ng NDF sa kahilingan ng *non-government peace mission* alang-alang sa makataong kadahilanan.

Naging dramatiko ang mga sumunod na tagpo sa isinagawang *turnover*. Bago tuluyang lumayo si Bernal na kasama ang mga sumundo sa kanya ay bumalik ito sa kinaroroonan ng mga mandirigma, isa-isa itong kinamayan at sinabing "magpakatatag kayo".

Mula sa paanan ng bundok na pinaghatiran kay Bernal, ito ay dinala ng mga kinatawan ng ICRC sa Poor Clare's Monastery, ilang metro lamang ang layo, kung saan naghihintay ang *humanitarian peace mission* na pinangunahan ni Bishop Miguel Varela at mga kinatawan ng NDF.

Sa pagharap ni Bernal sa midya, tuwirang inihayag nito na "namulat ako sa bundok. Dapat igalang ng gobyerno at ng mga kasamahan ko sa militar ang karapatang-tao ng mga

mamamayan". Ang mga pahayag na ito ni Bernal ay narinig ng milyunmilyong mamamayang sumusbaybay sa radyo habang isinasahimpapawid ang naturang okasyon.

Ayon kay Bernal, sa buong panahong pagkakabihag sa kanya ng BHB ay trinato siya nito alinsunod sa itinatadhana ng Komprehensibong Kasunduan sa Paggalang sa mga Karapatang-tao at Internasyunal na Makataong Batas (Comprehensive Agreement on Respect for Human Rights and International Humanitarian Law, CARHRIHL). Ang kasunduang ito ay pinagtibay ng gobyerno ng Pilipinas at ng NDF noong 1998.

"Hindi nila ako sinaktan. Ang kinakain nila ay kinakain ko rin. Pinangangalagaan nila ang aking kalusugan. Malaya akong nakakagalaw at natural lang na binabantayan nila ako sa gabi para na rin sa aking seguridad," dagdag pa ni Bernal. Sinabi rin ni Bernal na kusang-loob siyang tumutulong sa mga man-dirigma sa pagluluto at iba pang gawain.

Pawang katotohanan ang inilahad ni Bernal sa madla kaugnay sa kanyang naging karanasan habang nasa kamay siya ng BHB. Nakita niya ang kaibahan ng hukbong bayan bilang tunay na sundalong naglilingkod sa sambayanan. Nasaksihan mismo

niya kung paano taimtim na isinasakatuparan ng hukbong bayan ang Regulasyong Militar at ang mga isinasaad sa CARHRIHL na tinalakay sa kanya ng mga mandirigma. Ito marahil ang nag-udyok kay Bernal upang ipanawagan sa kanyang gobyernong pinaglilingkuran at sa kapwa niya sundalo na dapat igalang nila ang mga karapatang-tao ng mamamayan.

Ngunit sa kabila ng panawagan ni Bernal, patuloy na pinatitindi ng rehimeng US-Estrada ang militarisasyon sa kanayunan. Mas pinasahol pa nito ang pagmamalupit sa mga magsasaka at lansakang nilalabag ang kanilang mga karapatang-tao.

Batay sa ulat ng namumunong komite ng BHB sa lalawigan ng Sor-

sogon, inaresto si Bernal ng isang Sandatahang Yunit Pampropaganda sa bahay ng kanyang kinasamang babae sa Bgy. San Juan, Bacon, Sorsogon noong Pebrero 21.

Si Bernal ay dating *field officer* ng Regional Special Action Force at may

mga paglabag sa karapatang-tao nang maitalaga sa Albay. Naging opisyal ito sa paniktik sa Sorsogon PNP Provincial Command at may rekord ng pagmasaker sa mag-anak na Felonia, (hindi Perolino tulad ng iniulat sa *Silyab*, Enero-Marso 1999) mga *parahagot* sa Bgy. Fabrica, Barcelona noong 1987. Sangkot din si Bernal sa sindikato ng shabu sa probinsyang ito.

Ang pag-aresto kay Bernal ay bahagi ng mga taktikal na opensiba na isinasagawa ng BHB sa mga ahente ng reaksyunaryong estado at iba pang kaaway ng sambayanan. **S**

Ngunit sa kabila ng panawagan ni Bernal, patuloy na pinatitindi ng rehimeng US-Estrada ang militarisasyon sa kanayunan.

Army, PNP, holdaper, may sindikato ng shabu, jueteng

MGA ELEMENTO ng PHILIPPINE ARMY (PA) at PHILIPPINE NATIONAL POLICE (PNP) ang nasa likod ng mga masasahol na krimen tulad ng panghoholdap, sindikato sa shabu, jueteng, iligal na pangingsda, iligal na pagtotroso, ismagling, prostitusyon, pangangalabaw at pangigkil sa mamamayan sa Bikol.

Itinuro ng mga nakasaksi sina Korporal Ronald Cleofe at Korporal Tranquilino Miligreto, mga kasapi ng Colt, *intelligence unit* ng 16th Infantry Battalion (IBn), PA, Charlie Company na siyang nagholdap sa isang bus ng Philtranco sa Barangay Minasag, Sta. Elena, Labo, Camarines Norte noong Abril. Kasama ng mga ito sina Junior Mamirez at Arnel "Ting" Roco, mga residente ng Bgy. Tigbinan, at nilimas ang pera at alahas ng mga pasahero, drayber at koleksyon ng konduktor na nagkakahalaga ng P12,000.

Biktima rin ng panghoholdap ng mga notoryosong sundalo at CAFGU ng 16th IBn ang isang nagngangalang Dela Torre sa Bgy. Silang II, Labo noong Marso 25.

Sangkot din sina Korporal Cleofe, Korporal Miligreto, Mamirez at Roco sa operasyon ng sindikato ng shabu sa Camarines Norte. Kasama rito sina M/Sgt. Juan Romero, Sgt. Arturo Toririt at Korporal Dante Marsicotes, pawang nakatalaga sa 203rd Infantry Brigade. Si Korporal Delfin Zabala naman ng 42nd IBn ay sa Camarines Sur.

Ang shabu ay nakapipinsala sa taong gumagamit nito. Kadalasan, target ang mga kabataan ng mga sindikato na kinasasangkutan mismo ng militar. Ang di-mapigilang paglaganap ng shabu sa Bikol ay tiyak na magdudulot ng matinding pinsala sa

mga mamamayan dito at magbubunsod ng mas masasahol pang krimen.

Sinasabing bukod sa pagtutulak ng shabu, ang mga opisyal at tauhan ng PA at PNP ay kumikita ng limpak-limpak na salapi sa operasyon ng jueteng, iligal na pangingsda, iligal na pagtotroso, pangangalabaw at pangigkil sa mga magsasaka at maliliit na negosyante sa mga lalawigan ng Albay, Sorsogon, Catanduanes at Masbate. Kasabwat din ang mga ito sa ismagling at sindikato ng prostitusyon.

Ayon sa ulat, mga opisyal at tauhan mismo ng PA ang nagkakanlong sa dating Army na si Diolito Llosala, kilalang holdaper at siyang pumaslang kay dating Mayor Manny

Sia ng Pilar, Sorsogon noong Mayo.

Sa Albay naman, sinasabing mga opisyal at tauhan din ng PA at PNP ang nagbibigay proteksyon sa mga *operator* ng jueteng. Protektor din ang PNP sa operasyon ng iligal na pangingsda tulad ng *trawl* ang kapasid ni Governor Al Francis Bichara na si Anton na kung saan ginagawa ang pangingsda sa loob ng *municipal fishing grounds*.

May kapayapaan bang maaasahan ang mga mamamayan sa bulok na gobyerno ng rehimeng US-Estrada?

Tulad ng kanilang mga amo, inaapi ng militar, pulisya at CAFGU ang mga mamamayan at rebolusyonaryong pwersa na nakikibaka para sa matiwasay na lipunan. ®

51 pulis, lumayas, abusadong mga opisyal, isinuka

LUMAYAS ang 51 myembro ng PHILIPPINE NATIONAL POLICE (PNP) dahil sa pang-aabuso ng mga opisyal habang inilulunsad ang pagsasanay sa isang kampo sa lalawigan ng Albay. Ang pangyayaring ito ay nagdulot ng malaking kahihyan sa organisasyon ng PNP at laluna sa rehimeng US-Estrada.

Ayon sa ulat, hindi naipagkaila ni Chief Supt. Marcelo E. Navarro Jr., PNP Regional Director ng Region V, ang pag-awol (*absent without official leave*) ng 51 pulis na dulot ng labis na pagkadiskuntento sa pamamalakad sa PNP. Hindi na natiis ng mga nagsasanay na pulis sa Camp Villa Hermosa, Daraga,

Albay ang mga katiwalian at pang-aabuso ng kanilang mga opisyal kung kaya nagpasya ang mga ito na mag-awol noong Mayo 16. Anila, hindi makatao ang trato sa kanila ng mga *trainors*. Ang pagkain na ibinigay ay yaong nababagay lamang sa mga hayop.

Hindi lamang bantog ang PNP sa pang-aabuso sa mga karaniwang mamamayan kundi pati rin sa kanilang mga tauhan. Milyunmilyon ang kinukulimbat ng mga opisyal nito habang labis na pinahihirapan ang mga ordinaryong kawal. Batid ng 51 pulis na karaniwan nang gawi ito sa bulok na estadong kanilang pinaglingkuran bagay na pumukaw sa kanila upang ito ay talikuran. ®

Army, patuloy ang terorismo sa Bikol

WALANG HABAS na nilalabag ng mga pwersa ng PHILIPPINE ARMY (PA) ang mga karapatang-tao ng mga mamamayan sa rehiyon ng Bikol.

Ang sapilitang pagpapalikas ng 22nd Infantry Battalion (IBn), PA sa mga magsasakang naninirahan sa Balaba, Balinad, at Lidong, mga barangay na saklaw ng bayan ng Polangui, Albay at Bgy. Buraburan, Buhi, Camarines Sur noong Abril ay nagdulot ng dislokasyon sa kanilang kabuhayan. Ito ay tahasang paglabag sa karapatan ng mga naturang magsasaka na mamuhay nang matiwasay sa kanilang lugar.

Sari-saring pang-aabuso rin ang ginagawa ng tropa ng 16th IBn, PA laban sa mga magbubukid sa Camarines Norte. Hinaras ng mga elemen-

to ng Colt, *intelligence unit* ng 16th IBn, sa pangunguna ni Sgt. Atsas, ang mga magsasaka sa Bgy. San Rafael, Jose Panganiban noong Abril. Iligal na inaresto nito sina Freddie Bihon, Domingo Cañete, na diumano ay may baril, sa Sityo Panggono, Bgy. San Isidro sa parehong bayan at ang isang magsasaka sa Bgy. Alayao, Capalonga na ninakawan pa ng manok.

Mariing tinututulan din ng mga mamamayan sa Masbate ang hangarin ng ilang opisyal ng pamahalaang lokal na magtalaga ng mga notoryosong tropa ng PA. Anila, ikinakatwiran ng mga berdugong opisyal dito ang rebolusyonaryong kilusan ngunit ang tunay na layunin ay gamitin ang mga bayarang militar sa pangangamkam

ng lupang sinasaka ng mga magbubukid, laban sa karibal na pulitiko para masarili ang kapangyarihan at para lalo pang abusuhin ang malaon nang aping kalagayan ng mamamayang **yandito**. ⑧

Matatagumpay na taktikal na opensiba

GUINOBATAN, Albay -- Pinarusahan ng Bagong Hukbong Bayan (BHB) ng kamatayan si Rudy Uno sa Barangay Bubulusan noong Mayo 13. Bukod sa pangingikil at panghahas sa mga mamamayan ng Bgy. Sto. Cristo, Pio Duran ay napatunayan din na ito ang pumatay sa isang residente rito. Si Uno at ang pamilya nito ay masugid na giya sa mga operasyon ng militar laban sa mga rebolusyonaryo.

19 kasapi ng BHB, nagtapos sa pagsasanay medikal

MASBATE -- Labing-siyam na kasapi ng Bagong Hukbong Bayan ang sinanay kamakailan sa gawaing medikal upang mabigyan ng sapat na kakayahan at kaalaman para sa paggampan ng rebolusyonaryong gawaing pangkalusugan sa lalawigang ito.

Ang isang buwang pagsasanay na inilunsad sa isang larangang gerilya rito ay pinangasiwaan ng istap sa medikal sa rehiyon at ilang namumunong kadre. Kabilang sa mga itinuro sa 19 na mandirigma ay ang tamang pagsusuri sa

maysakit, pangangalaga sa pasyente, paggamot sa mga karaniwang sakit, pagsasagawa ng minor na operasyong *surgical*, pagbunot ng ngipin, pagsukat ng salamin sa mata, herbal at akupangtura.

Pagkatapos ng pagsasanay ay sisimulan nang ilunsad sa lalawigang ito ang pagbibigay ng mga serbisyong pangkalusugan sa anyo ng klinikang bayan at pagbibigay-edukasyon sa masa at kasama. Ang 19 na nagsipagtapos ay magsisilbi ring *medical officer* ng kanilang yunit. ⑧

MASBATE, Masbate -- Inisparang si Nardo Almoda, dating CAFGU, habang nagsusugal sa Sityo Calolod, Bgy. Pawa, noong Enero 6. Si Almoda ay isang masugid na giya sa mga kontrarebolusyonaryong operasyon ng militar. Samantala, napatay si Edgar "Iliw" Tumbaga, myembro ng CIVILIAN VOLUNTEERS' ORGANIZATION (CVO, hindi CAFGU, tulad ng unang iniulat sa *Silyab*, Enero-Marso 1999) sa isinagawang reyng ng isang yunit ng BHB sa destakamento sa Bgy. Sinalongan (hindi Bgy. Cagay) noong Pebrero 6. Nasamsam dito ang isang M14, mga bala, *ammo pouch* at mga dokumento. Malaon nang inirerek-lamo ng mga mamamayan ang mga pang-aabuso ng mga pulis at CVO nang **katalagaito**. ⑧

"Kung walang hukbo, wala ni anuman ang mamamayan."

Mao Zedong

Tigib man ng sakripisyo at kahirapan, sumusuong sa landas ng makauring digma ang Bagong Hukbong Bayan upang wakasan ang paghihirap ng mamamayan. Sa ika-30 taon ng pagkakatatag, parangalan natin ang magiging na mga kasapi nito sa pamamagitan ng dalawang tula.

Ang *Alaala ng Bayani* ay para sa mga bantayog ng rebolusyon — ang mga kasamang nagbuwis na ng buhay alang-alang sa mithiing ibagsak ang kasalukuyang mapang-api at mapagsamantalang sistemang panlipunan. Para naman sa mga nagpapatuloy ng digma ang *Hukbo kan Namamanwaan* — tumutukoy ito sa mga katangian ng Hukbo at sa kanilang masikhay at walang humpay na pakikibaka para sa minimithing tagumpay.



Alaala ng Bayani

Sagisag Tejero

1 Pebrero 1999

Katawang bumagsak sa katanghalian
Bayani kang luwal ng ating digmaan
Ang dugong inialay ng iyong katawan
Sa lupa'y pandilig at handog sa bayan.

Isa kang huwaran, dakilang kasama
Di ka malilimot sa isip ng masa
Ang kabayanihan sa pakikibaka
Sa amin ay tanglaw, laging alaala.

Ang mga aral mo't mga katuwaan
Ang ngiti at lambing sa masa'y naiwan
Hindi maglalaho, hindi mapaparam
Ito'y kayamanang laging alagaan.

Di man nasilayan ang bagong umaga
Ng iyong mithiing laging may pag-asa
Laban mong naudlot sa pagkabulagta
Ipagpapatuloy ng kasama't masa.

Ang mga kasama't magsasaka
Na iyong pinanday ang isip at diwa
Isusulong nila ang pakikibaka
Upang ipagtagumpay itong matagalang digma!

Hukbo kan Namamanwaan

Adelina Diwata

30 Abril 1999

Rebolusyonaryo, ladawan nin kadisidiran
Hukbong labi kasimple, mahigos, matinabang
Mga kadipisilan dai inaatrasan
Dai natatakot sa sakripisyo, kagadanan.

Nagkukua nin mga adal sa mga karanasan
Urog na nagpapakusog sa pagpupunahan
Mainadal sa teorya, mayaman sa praktika
Mahigot an kapot sa linyang masa.

An Bagong Hukbong Bayan naninindugan
na bako sanang badil an kinakaipuhan
Kundi an solidong pag-oorganisar
Kan masang sa gera tunay na armas.

Mulat an isog sa pag-atubang
Sa mga atake kan mga kaiwal
MLM an dara, kaibahan an masa
Sa pagrunot, pagrumpag sa mga pasista.

Padagos, papadakul, papakusog
Sa namamanwaan an buhay anduyog
Lambang lakdang pano nin paglaban
Lambang pag-uswag pasiring sa kapangganahan!



Rebolusyonaryong awit

Martsa ng Nagkakaisang Hanay

Intro: A - D - E

Refrain:

A D
Tayo'y naghahanda ng daan
E A
Alang-alang sa ating bayan
Ngayon na ang panahon
E A-A7
Sa pagsusulong ng rebolusyon (2X)

C#m F#m
Manggagawa, magkaisa
Bm E
Lumabas ka sa pabrika
C#m F#m
Pamunuan ang pakikibaka
Bm E
Laban sa pagsasamantala

(*Ulitin ang refrain*)

(Parehong tipa)

Magsasaka, bumangon ka
Lupa ay bawiin na
Ang uring pinahihirapan
Sama-samang magkaisa
(*Ulitin ang refrain*)

Kabataan, gumising ka
Akyatin mo ang kabundukan
Sumanib ka sa hukbong bayan
Sa landas ng matagalang digmang bayan
(*Ulitin ang refrain*)

Kababaihan, lumaban ka
Sumulong ka at humawak ng sandata
Karapatan sa lipuna'y ipaglaban
Himagsikan ang kasagutan
(*Ulitin ang refrain*)

Taong simbahan at propesyunal
Petiburgesya ng kalunsuran
Negosyante na makabayan
Mga minorya, magsulong ng digmaan
(*Ulitin ang refrain*)

